

წყალტუბოს მუნიციპალიტეტის საკრებულო

გ ა ნ კ ა რ გ უ ლ ე ბ ა №__

2025 წლის __ ნოემბერი

ქ. წყალტუბო

არასამეწარმეო (არაკომერციული) იურიდიული პირის „წყალტუბოს მუნიციპალიტეტის კულტურის ცენტრი“-ს მიერ 2025 წლის I-II კვარტალში გაწეული მუშაობის შესახებ

წყალტუბოს მუნიციპალიტეტის საკრებულომ მოისმინა ა(ა)იპ „წყალტუბოს მუნიციპალიტეტის კულტურის ცენტრი“-ს ანგარიში 2025 წლის I-II კვარტალში გაწეული მუშაობის შესახებ (თან ერთვის).

აღინიშნა, რომ წარმოდგენილი ანგარიში შესაბამისობაშია კანონმდებლობასთან და სათანადო დებულებით გათვალისწინებულ მოთხოვნებთან.

ზემოთ აღნიშნულიდან გამომდინარე, საქართველოს ორგანული კანონის „ადგილობრივი თვითმმართველობის კოდექსის“ 61-ე მუხლის მე-2 ნაწილისა და „წყალტუბოს მუნიციპალიტეტის საკრებულოს რეგლამენტის დამტკიცების შესახებ“ წყალტუბოს მუნიციპალიტეტის საკრებულოს 2017 წლის 28 ნოემბრის N36 დადგენილებით დამტკიცებული რეგლამენტის 25-ე მუხლის პირველი პუნქტის „ვ“ ქვეპუნქტის შესაბამისად:

1. დამტკიცდეს ა(ა)იპ „წყალტუბოს მუნიციპალიტეტის კულტურის ცენტრი“-ს ანგარიში 2025 წლის I-II კვარტალში გაწეული მუშაობის შესახებ.
2. ა(ა)იპ „წყალტუბოს მუნიციპალიტეტის კულტურის ცენტრი“-ს“ მიერ 2025 წლის I-II კვარტალში გაწეული მუშაობა შეფასდეს დადებითად.
3. განკარგულება ძალაში შევიდეს გამოქვეყნებისთანავე.
4. განკარგულება შეიძლება გასაჩივრდეს კანონით დადგენილი წესით, მისი გაცნობიდან ერთი თვის ვადაში, ქუთაისის საქალაქო სასამართლოში (მის: ქ. ქუთაისი, კუპრადის ქ. №11).

მოამზადა:

აპარატის უფროსი



გელა თათარაშვილი

შეთანხმებულია:

კომისიის თავმჯდომარე



ლევან ჩანქსელიანი

არასამეწარმეო (არაკომერციული) იურიდიული პირი
„წყალტუბოს მუნიციპალიტეტის კულტურის
ცენტრი“

წყალტუბო, რუსთაველის ქ. N25

44-21-2-202511181414

N 44/21



18.11.2025

წყალტუბოს მუნიციპალიტეტის

საკრებულოს თავმჯდომარეს

ბატონ თეიმურაზ ჭეიშვილს

ბატონო თეიმურაზ,

გიგზავნით ინფორმაციას, ა (ა) იპ. წყალტუბოს მუნიციპალიტეტის „კულტურის ცენტრის“ -
2025 წლის 1 და მე-2 კვარტალში განხორციელებული მუშაობის შესახებ.

დანართი 5 ფურცელი.

პატივისცემით ,

ლილი გელენიძე

მმართველი - მ.შ.

ა(ა)იპ „წყალტუბოს მუნიციპალიტეტის კულტურის ცენტრის“ ანგარიში 2025 წლის 6 თვეში გაწეული მუშაობის შესახებ

მ/წელს ა(ა)იპ „წყალტუბოს მუნიციპალიტეტის კულტურის ცენტრი“, ჩვეული რიტმით შეუდგა თავისი ფუნქციის განხორციელებას, რომელიც ითვალისწინებს კულტურულ დაწესებულებათა საქმიანობის ორგანიზებას და მუნიციპალიტეტის ტერიტორიაზე კულტურის განვითარებისათვის სათანადო პირობების შექმნას. აღნიშნულ ფუნქციას კულტურის ცენტრი წარმართავს თავის დაქვემდებარებაში მყოფ სტრუქტურულ ერთეულებზე დაყრდნობით. ესენია: 29 ბიბლიოთეკა, 2 კულტურის სახლი, 10 სასოფლო კლუბი, 3 მუზეუმი, ფოლკლორული ანსამბლი „ნადური“, ქორეოგრაფიული ანსამბლი „ივერია“ და სახალხო თეატრი. მათი საქმიანობის გააქტიურებისათვის მიზნობრივად გამოიყენება, როგორც ადგილობრივი ბიუჯეტით გამოყოფილი თანხები, ასევე საკონცერტო დარბაზის გაქირავებით, მუზეუმის ბილეთების ამონაგებითა და ფასიანი წრეებით მიღებული შემოსავლები.

საანგარიშო პერიოდში კულტურის ცენტრის გეგმა შეადგენდა 1134439 ლარს, ხოლო ხარჯი 932786 ლარს. მათ შორის: ბიუჯეტიდან მიღებული გეგმა -1090667 ლარია, ხარჯი 921412 ლარი, საკუთარი სახსრებით გეგმა - 43772 ლარი, ხარჯი - 11374 ლარი.

მ/წლის 6 თვეში დარგების მიერ გაწეული მუშაობის შედეგები ასე გამოიყურება:

საბიბლიოთეკო გაერთიანება მოემსახურა 1400-მდე მკითხველს და მათზე გაიცა 7000 მეტი წიგნი. მომსვლელთა რაოდენობა (ანუ გამტარიანობა) 29 ბიბლიოთეკაში ჯამურად შეადგენს 4900 კაცს. რაც შეეხება სალონისძიებო საქმიანობას, საბიბლიოთეკო გაერთიანება ამ კუთხით მუშაობას წლის დასაწყისიდანვე შეუდგა.

იანვრის თვეში მთავარ ბიბლიოთეკაში მოეწყო კონკურსი „ჩემი ხელწერა“, რომელშიც 15 საჯარო სკოლის 82 კონკურსანტი მონაწილეობდა.

თებერვალში ქსელის ბიბლიოთეკარები აქტიურად ჩაერთვნენ წიგნის საჯაროდ კითხვის მსოფლო მარათონში. 29 ბიბლიოთეკაში 200-მდე მკითხველის მიერ ერთდროულად საჯაროდ იკითხებოდა წლის იუბილარი მწერლების ნაწარმოებები. ამავე თვეში გეგუთის სასოფლო ბიბლიოთეკამ საჯარო სკოლასთან ერთად დავით აღმაშენებლის დღეს მიუძღვნა ლიტერატურულ- მუსიკალური კომპოზიცია „რომელმაც აღაშენა“. ხაზგასმით უნდა აღინიშნოს, რომ კულტურის დაწესებულებების სალონისძიებო შემოქმედებით საქმიანობაში აქტიურად არიან

ჩართული საჯარო სკოლების მოსწავლეები და პედაგოგები, რაც მნიშვნელოვნად ამაღლებს მიღებულ დადებით შედეგებს.

მარტში საბიბლიოთეკო გაერთიანებამ საკადრისად აღნიშნა აკაკი წერეთლის დაბადებიდან 185 წლისთავი. 16 ბიბლიოთეკაში გაიმართა ლიტერატურული სპექტაკლი „ცა-ფირუზ, ხმელეთ-ზურმუხტო“. საიუბილეო პროექტი კი დაგვირგვინდა ლიტერატურული კონკურსით „რა ვიცით აკაკი წერეთლის ცხოვრებისა და შემოქმედების შესახებ“. კონკურსში ბიბლიოთეკებთან ერთად ჩართული იყო მუნიციპალიტეტის საჯარო სკოლების 14 გუნდი 70 მონაწილით.

რიონის ბიბლიოთეკა მონაწილეობდა სასკოლო პროექტში „ჩვენ ვსწავლობთ სოფლის ისტორიას“. საყულის ბიბლიოთეკა ახალგაზრდა მკითხველკებით ესტუმრა გელათის აკადემიას.

აპრილში ქალაქის საბავშვო ბიბლიოთეკაში, პირველი საჯარო სკოლის მოსწავლეთა ჩართულობით გაიმართა ლიტერატურულ-მუსიკალური კომპოზიცია „ენა დედაა ერისა“. ამავე ბიბლიოთეკამ თებერვალში გამართა დიალოგი წიგნზე კავკას „მეტამორფოზები“ და ზღაპრის დღე, რომელიც ქრისტიან ანდერსენის დაბადების დღეს დაუკავშირა.

მაისში, მ/წლის ყველაზე დიდი პროექტი იყო საბიბლიოთეკო კვირეული. ამ ტრადიციული ზეიმის ღონისძიებები კი ასეთი გახლდათ:

შეხვედრა- დიალოგი მწერალ ბაია ბოჭორიშვილთან - მაღლაკში.

შეხვედრა მშობლიურ სკოლასთან - მწერალი გია ხოფერია - მუხიანში.

თემატური საღამო წიგნი - „კაცთა მონიჭებული პირველი სიმდიდრე“ - გვიშტიბში.

პოეზიის საღამო სტუმრად პოეტი მურთაზ კანკაძე - გუმბრაში.

ქველმოქმედების დღე - ბიბლიოთეკა შშმ პირთა სახლის ბენეფიციარებთან - რიონში.

ახალ წიგნებთან მოგზაურობა - საბავშვო ბიბლიოთეკაში.

პოეზიის საღამო - დღის სტუმარი პოეტი და მეცნიერი ომარ გვეტაძე-ფარცხანაყანევში.

შეხვედრა პოეტ ლალი ფრუიძესთან - ოფურჩხეთში.

პოეზია და მოგონებანი - მიეძღვნა ზვიად გამსახურდიას და მერაბ კოსტავას - ხომულში.

ლიტერატურულ-მუსიკალური კომპოზიცია „მაგონებს გიტარა იმ ლამაზ ლექსს“ - გეგუშთი

შეხვედრა მწერალ გიზო თავაძესთან - ოფშკვითში.

ივნისში ბიბლიოთეკებმა მწერალ ოტია იოსელიანის დაბადების 95-ე წლისთავს მიუძღვნეს მუნიციპალური კონკურსი მწერლის და შემოქმედების ცოდნის გამოსავლენად. მასში მონაწილეობდა 16 გუნდი 98 მონაწილით. მწერლის საიუბილეო კვირეული დაგვირგვინდა ლიტერატურული სპექტაკლით „სიშირით სიახლოვე“, რომელიც ადგილობრივი თვითმმართველობის ხელშეწყობით და სპექტაკლის ავტორის შალვა აბაშიძის მონაწილეობით ჩატარდა საკონცერტო დარბაზში.

აღსანიშნავია, რომ მარტში მთავარი ბიბლიოთეკის ინიციატივით და კომუნიკაციების კომისიის მხარდაჭერით „ციფრული მხარდაჭერის პროგრამის ფარგლებში“, 14-მა ბიბლიოთეკარმა გაიუმჯობესა ციფრული შესაძლებლობები - შეისწავლა ხელოვნურ ინტელექტთან დიალოგის ფორმები, გუგლის აპლიკაციებით სარგებლობა და სხვა რაც საბიბლიოთეკო დარგში უნდა იქნას გამოყენებული.

არანაკლები მნიშვნელობისაა და რთულიც საბიბლიოთეკო ფონდებთან მუშაობა და მეთოდური საქმიანობა. დაზუსტდა ჩამოსაწერად გამოყოფილი ლიტერატურის სიები და მომზადდა ჩამოსაწერ კომისიაზე გადასაცემად. სარეზერვო ფონდიდან წყალტუბოს პირველი ბიბლიოთეკისათვის გამოიყო და დამუშავდა 380 წიგნი. შემოწმდა ამავე და ჟონეთის ბიბლიოთეკის ფონდები და განხორციელდა ძირეული ცვლილებები ორივე ფილიალის იერსახის შესაცვლელად მხატვრული ლიტერატურის ინდექსების რედაქტირებასა და ფონდის განლაგებაში.

მთავარი ბიბლიოთეკის ბიბლიოგრაფები სისტემატურად კრებენ პერიოდული გამოცემებიდან საინტერესო ინფორმაციებს და ავსებენ თემატურ კართოთეკებს. მომზადდა სლაიდ შოუ - „ბიბლიოთეკების ქრონიკა 2020-2024წწ“.

პარლამენტის ეროვნული ბიბლიოთეკიდან, ავტორებისგან და მკითხველებისგან მიღებული იქნა 82 წიგნი, ღირებულებით 1135,90 ლარი. ასევე კულტურის სამინისტროს ვაუჩერით შეძენილი იქნა 56 წიგნი ღირებულებით 900 ლარი, რომელიც დამუშავდა და გადანაწილდა 8 ბიბლიოთეკაში. ამ დროისათვის შემოსულია 138 ცალი წიგნი.

მ/ წლის აღნიშნულ პერიოდში მუნიციპალიტეტის მუზეუმების ფონდები შეივსო 393 ექსპონატით (ფოტო, დუკუმენტი, ეთნოგრაფია).

მუზეუმებში დაცული დოკუმენტებით ისარგებლა 16-მა ადამიანმა (წყალტუბოს საჯარო სკოლების მოსწავლეები), რომელთაც მიეწოდათ მასალები

წყალტუბოს სანატორიუმების, წყალტუბოს მუნიციპალიტეტის სოფლებისა და ეკლესია-მონასტრების შესახებ.

ივნისის თვეში მუზეუმის თანამშრომლებმა მოაწყვეს დაზვერვითი გასვლა სოფელ ჩუნეშის ციხის ნანგრევებზე და შეისწავლეს ციხის ეზოში აგებული წმინდა სტეფანეს სახელობის უძველესი ეკლესია.

საანგარიშო პერიოდში მუზეუმის თანამშრომლები მუშაობდნენ მუზეუმის შრომათა მომდევნო კრებულში დასაბეჭდ თემებზე.

მუზეუმის ბიბლიოთეკა შეივსო 28 წიგნით.

18 მაისს, მუზეუმების საერთაშორისო დღისადმი მიძღვნილი კვირეულის ფარგლებში, მხარეთმცოდნეობის მუზეუმში გამოიფინა ფონდებში დაცული ძველი ხელნაწერები. 56 წლის განმავლობაში მუზეუმის მიერ გამოცემულია წიგნები, ბუკლეტები, კრებულები. მოეწყო ღია კარის დღე. მხოლოდ ამ დღეს მუზეუმი უფასოდ დაათვალიერა 77 ვიზიტორმა. აპრილსა და მაისში მუზეუმებში ჩატარდა 2 ღია გაკვეთილი. სოფელ ჩუნეშისა და მაღლაკის მე-2 საჯარო სკოლების მასწავლებლების და მოსწავლეების მონაწილეობით.

მუზეუმებში მოეწყო 8 დროებითი გამოფენა. მხარეთმცოდნეობის მუზეუმის ესპოზიციებით დაინტერესება გამოხატა თბილისის ტელევიზიამ LTV-მ და გადაცემისთვის „ჩემი საქართველო“ გადაიღო საექსპოზიციო დარბაზები (ჟურნალისტს მუზეუმის შესახებ ესაუბრა სამუზეუმო გაერთიანების მენეჯერი ია კუხალაშვილი).

2025 წლის 6 თვეში მუზეუმი დათვალიერა 549 ვიზიტორმა. ჩატარდა 97 ექსკურსია - ლექცია.

საანგარიშო პერიოდში კულტურის ცენტრის მიერ ორგანიზებული ღონისძიებებიდან აღსანიშნავია აგრეთვე სახალხო დღესასწაულები „თამარობა“ - სოფელი გეგუთი და „ელიაობა“ - სოფელი მაღლაკი . ჩვენი შემოქმედებითი კოლექტივების აქტიური მონაწილეობით წარიმართა სახალხო დღესასწაული „შემოდგომის წყალტუბო“ . სანახაობრივად საინტერესო იყო საქართველოს დამოუკიდებლობის დღისადმი მიძღვნილ საზეიმო კონცერტი ფოლკლორული და ქორეოგრაფიული ანსამბლების „ნადურისა“ და „ივერიის“ მონაწილეობით. ეს უკანასკნელი ზაფხულში სპეციალური მიწვევით საგასტროლოდ იმყოფებოდა თურქეთის ქალაქ ბურსაში.

სახალხო თეატრის დასმა მოამზადა სპექტაკლი, რომლითაც მონაწილეობა მიიღო იმერეთის საერთაშორისო ფესტივალში. სულ უფრო წარმატებული ხდება ამავე თეატრის თოჯინური დასის საქმიანობა. ამ წელს დაიდგა ახალი თოჯინური სპექტაკლი „კომბლე“, რომლის ნახვა ადგილზე შესაძლებელია ყოველი კვირის

პარასკევს. სპექტაკლი უკვე ნახა ქალაქის საჯარო სკოლებისა და ბაღების 1000 ზე მეტმა პატარა მაყურებელმა.

ა(ა)იპ „ წყალტუბოს მუნიციპალიტეტის კულტურის ცენტრი“ მიზანმიმართულად აგრძელებს საქმიანობას 2025 წლისათვის დაგეგმილი ღონისძიებებისა და დებულებით გათვალისწინებული სხვა დავალებების შესასრულებლად.

ა(ა)იპ „ წყალტუბოს მუნიციპალიტეტის
კულტურის ცენტრი“-ს მმართველის
მოვალეობის შემსრულებელი

ლილი გელენიძე

